


Aras • Estellerria lirain

Aras herriak eskuratu du Herri Apainketaren III. Lehiaketaren lehen saria

Urtetik urtera
Estellerria gero eta
ederragoa dago.
Bertako Turismo
Partzuergoak herri,
karrika, eliza eta
etxeen apainketa
sustatzeko antolatzen
duen lehiaketa bere
fruituak ematen hasi
da dagoeneko.

ESTELLERRIKO MENDEBALDE-an dagoen Aras herriak irabazi du aurtengo Herri Apainketa Lehiaketaren aurreneko saria. Vianatik zazpi bat kilometrora dagoen herri hone-tan, Iturri Zaharra eta La Balsa izenez ezagunak diren parajeak atondu dituzte. Halaber, karrikak egokitu eta lorategiak jarri dituzte herrian barna. Arasen 230 lagun bizi dira, eta Udalak 20 milioi pezeta gastatu ditu lan horiek egiteko.

Joan den urteko lehiaketan aipamen berezia jaso zuen herri ttiki honek, eta orain, urte baten buruan, aurreneko saria eskuratu ahal izan du. Lehen sari horrekin 330.000 pezeta jasoko dituzte (13.200 libera). Diruarekin



Aras herriak irabazi du Estellerriko herri apainketen lehiaketa. Irudietan, La Balsa izeneko tokia. ● OSKAR MONTERO

zuhaitz gehiago landatzeko asmoa dute tokiko agintari politikoek.

Herri ttikien irudia hobetzea eta horren ondorioz kalitatezko turismoa sustatzea xede duen lehiaketa honetako aipamen berezia Esprontzeta herriak irabazi du, harraska atontzeagatik. Bertako 130 biztanleak poz-pozik daude garaietako usadioak gogora ekartzen dituen leku xarmagarri hau zaharberritu dutelako.

Orotara, bederatzi herri aurkeztu ziren. Deikaztelu, Torralba del Rio, Etaio, Acedo, Larrion, Antzin eta Villatuerta herriek eman zuten izena lehiaketan herri hauetako txoko ezberdinetan egin dituzten lanak direla-eta.

Partikularren sailean, Villamayor de Monjardin herriko bizilagun Valeriano Goñik eskuratu du lehen saria, garaietako etxe zaharrean egindako berri-tze lanegatik. Urte asko eman

ditu eraikinaren kanpoaldeko harria garbitzen, eta semeen laguntza ere izan duela aitortu du Goñik. Orain 165.000 pezetako saria (6.600 libera) jasoko du.

Norberak bere etxean egindako lanak saritzen dituen atal honetan bertze hamabost lagun aurkeztu ziren. Aipamen berezia Ollogoeneko biztanle batek eskuratu du, bere etxea nekazari etxe abegitsu bihurtzeagatik.

→ Kristina Berasain

Etxalar • Uso pasaren besta igandean

ETXALARKO USATEGIAK DIRA, ORPOZ ORPO dituzten Sarakoeekin batera, sareekin usoak ehizatzen dituzten bakanetakoak. Antzinako molde horren zaleek besta ospatuko da igandean, ohiturari jarraiki.

Urriko hirugarren igandeak hartu ohi du Usategietako Besta. Lizaieta gainaren inguruetan molde zaharrez ehizatzen dira usoak. Sareak baino ez dira erabiltzen ehizarako. Lehenik, palen bidez usoak jaitsarazten dituzte, turuta hotsekin batera. Modu horretan, lepoa pasatakoan sarerantz sartzen dira usoak, eta bertan harrapaturik gelditzen direnean behehitzen dira sareak. Eskuekin hiltzen dituzte gero usoak, banan-banan. Lan hori nola egiten den ikusteko parada izanen da igandean.

Inguruko herrietatik jende andana joanen da igandean Lizaietara oinez, ohitura izaten baita hori eskualdeko hainbertze jenderentzat. Azken aste honetan uso anitz pasatu



Usoak palen bidez jaitsarazten, Etxalarko usategi batean.

● EDURNE KOCH

da, eta igandeko besta ikusgarri egiteko beharrezkoa izanen da usoak orduan ere pasatzea, eguraldiak laguntzearekin batera, hori izaten baita igandeko bestako erakargarritasunik handiena.

Baina besta bezperatik hasiko da Etxalarren. Herritarrek bigarren urtez afaria egiten dute larunbatean, Anttonion. Garai ba-

tean kontzertu handiak egiten ziren bezperan, baina azken urteotan deus ere egiten ez zela eta, herritarrentzako besta prestatzen dute.

Igandean, berriz, arratsalde partean animazioa izanen da. Bazkalondoan Kiki, Koko, Moko eta Flash pailazoen emanaldia izanen da, plazan. Haurrentzako emanaldiaren ondotik musikak hartuko du plaza, Bigira taldearekin dantzaldia izanen baita. Atsedenean zozketatuko dira hain preziatuak diren usoak. Dozena bat uso bizirik zozketatzen da. Horrekin batera, herriko bestetako motozerra erakustaldian egindako egurrezko hiru irudi ere zotz egiten dira. Urteroko moduan, bildutako dirua elkarte bati bideratuko zaio. Aurtengoa, joan den urtean bezalaxe, herriko Andra Mari dantza taldearentzat izanen da.

→ Jon Abril



ur dai
aren
mintzoa

Xabier Larraburu

Zuhaitzen geruzak

Udazkena Larraburu-Enean. Zal-diak zalditegian gorderik. Neguko arropa esekitokian. Guardasola eta lokatzeak bota berriak atarian. Atzo piztu genuen lehenaldiz tximinia. Bexikulas (nire morroia) aurtengo egurra egitera laguntzen dut. Larraburu-Eneako basoak mututuak daude. Bexikulasek hautatutako pago bi botatzen ditu. Ez dago ihes egingo duen txoririk. Isiltasuna da nagusi hemen. Botatuko zuhaitzen barruan urtez urte idatzitako egutegia gelditzen da azaleratua. Bertan udaberri oro idatzi dituzten haragi geruzek zuhaitzaren bihotzaren baitan orbitatzen dute. Batzuk besteak baino handiagoak dira, baina dena da bizitza. Neguak, aldiz, ez dira inondik ageri. Neguetan zuhaitzak mututu egiten dira, ez dituzte elurte eta gau luzeak apuntatzen. Geruzen arteko marra beltz hori isiltasun sakon baten antzekoa da. «Honetaz ez dugu inongo iritzirik», esaten dutela ematen du. Ahots gora egindako hausnarketa hauek entzuterakoan «planetak ere zirkuluetan ibiltzen dira eguzkiaren baitan», esaten dit morroiak adaxkak aizkoraz txikitzen dituen bitartean, eta gero, «batek daki noren egutegi erraldoia edo haragi geruzak eginez...», bukatzen du sasipoesiaz. Asaldatu egiten nau Bexikulasek joera honek. Beti nire lana suntsitzen dabil tipoa. «Poetak poesiarra eta morroiak egurretara!», oihukatzen diot eskuak praketako sakeletan sartuak. «Bale, jefee!», erantzuten dit bizkarra emanda. Kabroi halakoa! Probokazio hutsa da, noski. Mila bider «Ados, jauna!» esan behar duela errepikatu diot, baina berak beti zirikatzen ibili behar. «Banoa, Bexikulas! Zutabea idatziz behar dut eta!, zera, Toyota Zalditegiaren aurrean utziko dizut (jajaja)». Toyotan sartu eta kalefakzioa eta irratia jartzen dut. Bexikulasek «De acuerdo, patron!» ozpindu batekin agurtzen nau. Etxetik hiru kilometrotara dauden bi pago hauekin zutabea idaztea otu zait bat-batean. Artikulu poetiko borobil bat osatuko dut. Zuhaitzen geruzen antzekoa. ●